

## 1 PITA

Pita'a Kalaisi agi'alefe'mo kanamo alige hanageke ya'mo alige hu'naya vaya'aife'mo mani avo'mo kae'niye. Agaemo apakesamo afisageno alino lokiya vaino apatesiyafe'mo Yesu Kalaisi'a agafu ki'niya kavafe'mo ava gemo huge fali'niya kavafe'mo ava gemo huge he ti'niya kavafe'mo ava gemo huge eminesiya kavafe'mo ava gemo huge huno mani avo'mo kae'niye. Goti'a lapamalageka nehisigetapae'mo o'atale'nisayana eminesiya afina'mo ha le konali ya'amo aligae, huno mani avo'mo kae'niye.

<sup>1</sup> Nagaemo Pita'namo Yesu Kalaisi apa veka'amo mai'ne'nae'mo Goti vaya'amo kalaga'mo hageta atagu faetapa uteta hutapa Ponitasi kotege maige Galesiya kotege maige Kapanosiya kotege maige Esiya kotege maige Mitiniya kotege maige hutapa mai'naya vaya'mogitapae'mo mani avo'mo nekaove. <sup>2</sup> Goti'a muki ya'mo afo'amo'mo lapaketeno'ae'mo, mafa'ne'nimo maigae, huno ago lekana paino lapate'niye. Auneme'amo'mo lapakaemo Yesu Kalaisife'mo ava gemo afitetapa akame hisageno Yesu Kalaisi kola'aleti'mo aino fuli fuli huno faleno lapatesiyafe'mo lapavaleno alino lapaote vaya'amo lapate'niye.

Lusi kava huno fiku lapa maeno lapaminageno lapaipamo'mo falu hino.

*Agava mai'neta lavayagunagu nehuna  
kavafe'mo ava gemo hu'niya gemae*

<sup>3</sup> Lagaemo Goti agi'ale'mo Ala kava netimo Yesu Kalaisi afo'amo agi'ale'mo alita asaga higetao. Lusi kava huno hau huno late'niya'mofe'mo Yesu Kalaisi'a fali'niyateti'mo ago alino he tino ate'niya kavateti'mo saufa vaya'mo halate alino late'niye. Lagaemo afole aisiya kavatefe'mo agava mai'netae'mo lama ge'alefe'mo lavayagunagu huta maisunafe'mo ani kava'mo hu'niye. <sup>4</sup> Afo'apimogi ya'mo mafa'ne'apimogi ne'aliya kava huta Goti'a agai'a ya'mo alisunafe'mo koku'napi yate'mo yagaino nelate. Ani ya'mo alagi okasalige alino hosu osuge atafa osege huno nehaneyanageno alagepa huno hanege hanege huno afa'a hanegaiye.

<sup>5</sup> Goti'a himamu'aleti'mo yagaino lapatege lapakesa afita fatago nehaya kavateti'mo yagaino lapatege huno yagaino nelapateyanageno lapakufamo alagi alino katino lapategaiye. Goti'a ago alo huno male'niyanageno henaga afina'mo afole aigiye. <sup>6</sup> Ani kavafe'mo lapamogaga ne'aiya'monanafa lapa maesiya hanageke ya'mo hemenimo aise afina'mo ali'nageno lapaipamo'mo kana hu'niye. <sup>7</sup> Goti'a lapakesa afita fatago nehaya kavafe'mo amalageka huno agegeno'ae'mo, kanale kava'mo hane'niye, huno hisiyafe'mo hanageke ya'mo alino lapami'niye. Vaya'mogimo hano hisiya goli yafa'mo ali'a atafi'mo kae'a age nekaya kava huno Goti'a lapakesa afita fatago nehaya kava'mo'a goli yafa'mo ago

aeno agase'niya kava'mogeno amalageka huno age neke. Agegeno'ae'mo kanale hu'nisigeno'ae'mo Yesu Kalaisi'a afole aisiya afina'mo ala lapakitapimo alino lapamige ha le konali ya'amo alino lapamige lapakitapile'mo alino asaga huno lapatege hisiyafe'mo amalageka huno age neke. <sup>8</sup> Yesu Kalaisi'mo lapaulagafati'mo o'age'naya'monanafa agaefe'mo lapau lapayamopafi'mo nelapaiye. Hemenimo o'age'naya'monanafa agaefe'mo lapakesa afita fatago nehutapa lusi kava hutapa lapamogaga ne'aiye. Lapaipafi'mo lapamogaga ne'aiya'monanafa lapavayafati'mo ge hisiyafe'mo lapavayamo'mo kana nehiye. Lapamogaga ne'aiya kava'mo'a muki ma mopafi yafe'mo apamogaga ne'aiya kava'mo ago aeno ne'agase. <sup>9</sup> Lapakesa afita fatago nehaya kava'mo'a alagamo ne'aegeno Goti'a lapakupi mafa'nemo alino katino ateme ateme ne'viya'mofe'mo lapamogaga ne'aiye.

<sup>10</sup> Akeya'vilaga vaya'mogimo Gotitegati gemo alini e'a ae'a hakalo hu'a hapa pai'naya vaya'mogi ani lapakufamo alino katino lapatesiya kavatefe'mo payamukiki hu'a kahauya huge huge hu'a mai'nae. Apakaemo apaune gemo, Goti'a fiku lapa maeno lapamigiye, hu'a hu'nae. <sup>11</sup> Kalaisi Auneme'amo apaipafi'mo mai'niya Auneme'amo'mo hogoteno, Kalaisi'a kanamo aliteno'ae'mo ala agi'amo aliteno ha le konali ya'amo aligiye, huno hapa pai'nige'apae'mo, hainu afina'mo afole aisifi, hu'a huge haiya kateti'mo afole aisifi, hu'a huge

nehu'apae'mo age'a ava tesayafe'mo kahauya hu'a mai'nae. <sup>12</sup> Goti'a, lapakaitapilefe'mo ani ali'yatapimo no'alifa henaga'amo afole aisaya vaya'aitefe'mo ani ali'ya'mo ne'aliye, huno hapa pai'niye. Hemenimo apa vaya'mogita Aote Auneme'amo koku'npati'mo alino ate'nigeno emine'niya Auneme'amo himamu'leti'mo mani alagepa faigoko ge'amo lapa nepaune. Enisole vaya'mogi'e'mo ani kava'mo aepa'amo agesayafe'mo nehapaiye.

*Lapaote kava'mo hiyo, huno hu'niya gemae*

<sup>13</sup> Ani alagepa faigoko gemo afole ai'niya'mofe'mo alagepa huta afisayafe'mo lapakesamo alo nehutapa lapakufale'mo yagaita lapateyo. Yesu Kalaisi'a emineno vaya'ai apaulagale'mo afole aiteno'ae'mo fiku laha maeno lamigiye, huta ani ge'aeke'mo lapakesamo ne'afitapa agava mai'netapa lapavayagunagu hutapa maiyo. <sup>14-15</sup> Lapakaemo gemo ne'afiya mafa'negana hutapage'mo maiyo. Hogotetapa Goti ge'amo o'afita amega lapakufamo'mo hau'niya kava'mo akame hutapa mai'naya'monanafa hemenimo lapakaefe'mo keya aeno ge hu'niya vekamo alagepa aote vekamo mai'niya kava hutapa muki kava'amo nehutapae'mo alagepa lapaote vaya'mo maiyo. <sup>16</sup> Na agufa gemo hu'niya'mofe'mae. Goti mukufi'mo avo'mo kae male'niya gemo'mo huno'ae'mo, *Alagepa naote vekamo mai'nova'mofe'mo alagepa lapaote vaya'mo maiyo*, huno hu'niye. <sup>17</sup> Nunumu nehutapae'mo, Afotimogae, hutapa agi ne'aya

vekamo'a vaya'ai amega apakufalefe'mo agesamo no'afifa muki vaya'aitegamo magoke aiyaya kavake'mo huno alagepa huno alino fako huno ne'apateya'mofe'mo ma mopafi'mo kalaga vaya'mo mai'netapae'mo koli hutapa maime maime viyo. <sup>18</sup> Lapakinago vaya'ai kava'mo'a alagepa huno lapa o'maesiya agufa kavake'mo hogotetapa akame hutapa mai'nae. Ani agufa kavategati'mo ago miya faino hatu maeno lapate'niya kavafe'mo ava gemo ago afi'nae. Kalaisi'a kasalisiya ya'mo siluva yafateti'mofi goli yafateti'mofi huno miya faino olapate'nifa <sup>19</sup> alagi hogote kanale ya'mo kola'leti'mo miya faino hatu maeno lapate'niye. Kalaisi'a alagepa sipisipimo mago hosu ya'amo alagi ohane'niya sipisipigana huno mai'neno fali'niye. <sup>20</sup> Goti'a ma mopa'e koku'na'e'mo alo osu'neno'ae'mo ema akeya'vilagamo ani ali'ya'mo alisiyafe'mo Kalaisi'a ago lekana paino ateteno henaga'amo apakaetefe'mo ago alino afole aino ate'niye. <sup>21</sup> Lapakaemo agaeteti'mo Gotife'mo lapakesa afita fatago nehae. Agaemo fali'niyateti'mo ago alino he tino ateteno ha le konali ya'amo alino mi'nigetapae'mo Gotife'mo lapakesa afita fatago nehutapa agava mai'netapae'mo lapavayagunagu nehae.

<sup>22</sup> Lama gemo afitetapae'mo lapaipamo sese huta atetetapa konaga vayatapie'mo lama ge huno lapau lapayamopafi'mo lapau'niya'mofe'mo lokiya kava hutapa yaveyave lapaipafati'mo lapau lapayamopafi'mo lapaino. <sup>23</sup> Goti'a kasalisiya avina yateti'mo

halate alino olapate'nifa okasalisiya avina ya'mo auneme'e gemo hanege hanege huno hanesiya ge'aleti'mo halate alino lapate'nigetapa mafa'ne'amo mai'nae. <sup>24-25</sup> Goti mukufi gemo'a ani kavatefe'mo huno'ae'mo, Muki vaya'ai amega apakufa'amo kahaugana huno hane'niye. Konali ya'apimo kahaumo ausegana huno hane'niye. Kahaumo leno falu netegeno'ae'mo ause'amo asagauno ne'aiya'monanafa Ala kava ne'mo ge'amo alagi hanege hanege huno hanegaiye, huno hu'niye. Mani alagepa faigoko ge'amo ago ae'a hakalo hu'a lapa pai'nae.

## 2

*Ala kava ne'mo afa'a ne'maiya yafakana huno mai'niya gemae*

<sup>1</sup> Hu'niya'mofe'mo lapakaemo vaya'aitegamo hosu kava'mo osuge aigofe gemo osuge ala lapakitapimo alisayafe'mo amega lapakufale alagepa kava'mo osuge lapaipa kafa ohapaege huta faipa huta o'apatege hutapa maiyo. <sup>2</sup> Nute mafa'nemogimo nufeke'mo lusi kava huno nehapaiye. Goti ge'amo nukana huno hane'niya'mofe'mo mani alagepa nufe'mo lapau'ninagetapa alita neyo netapa kosigayanagi. <sup>3</sup> Ala kava ne'mo'a fiku laha maeno nelamiya vekamo mai'niye, hutapa alita netapa afi ge'nisaya'mo'mo nufe'mo lapa'ye hino.

<sup>4</sup> Agaemo afa'a ne'maiya yafakana huno mai'nige'apae'mo afa yafa'mo hane'niye,

hu'a hu'naya'monanafa Goti'a lekana paino ateteno'ae'mo, hogote kanale yafane, huno hu'nigetapae'mo ani vekalegamō ne'ae.

<sup>5</sup> Lapakae'e'mo afa'a ne'maiya yafakana hutapa mai'nageno'ae'mo Goti'a lapakaeteti'mo Goti Auneme'amo maisiya no'mo kime kime ne'e. Lapaote vaya'mo mai'netapa lapaipafati'mo Goti'a amuse huno lapatesiya ofalinimo Yesu Kalaisiteti'mo Goti'a amisayafe'mo mono hutapa ne'apataya vaya'mo mai'nae. <sup>6</sup> Goti mukufi gemo'mo ani kavatefe'mo huno'ae'mo,

Afiyo, Nagaemo hogote kanale yafa'mo lekana pai'na atete'na no'mo kisuva yafa'mo Saiyoni kotegamo male'nove. Muki vaya'mogimo agaefe'mo apakesa afi'a fatago nehisyana alagi hapai o'vaigae,

huno hu male'niye. <sup>7</sup> Lapakesa afita fatago nehaya vaya'mogitapamo, hogote aeto agufa kumanī vekae, hutapa nehaya'monanafa apakesa afi'a fatago nosaya vaya'aife'mo Goti mukufi gemo'mo huno'ae'mo,

No'mo nekiya vaya'mogi, ina agufa yafa'mo hane'niye, hu'a hute'a ali'a yaga au'a atale'naya'monanafa hogote yafa'mo no'mo faino atesiya yafa'mo alino hamaleno ate'niye,

huno hu'niye. <sup>8</sup> Mago'e huno Goti mukufi gemo'mo huno'ae'mo,

Ani yafa'mo'a apaiyafi'mo hapaegē vai lamino hapaegē hisiyafe'mo hane'niye,

huno hu'niye. Apakaemo Goti ge'amo no'afiya'mofe'mo vai lamino nehapae. Goti'a

ani kava'mo hugae, huno hu male'niye.

<sup>9</sup> Huno hu male'niya'monanafa ago lekana paino lapate'niya vaya'mo mai'nae. Lapakaemo lapaote nofi vaya'amo mai'nae. Mono hutapa ne'apataya kini vaya'amo mai'nae. Lapakaemo Goti agai'a vaya'amo mai'nae. Goti'a keya aeno ge hu'nigetapae'mo hani hu'niya kavategati'mo eta agetetapa lapau ai'naya ha le kava'alegamo mai'nae. Agaemo lapakaefe'mo keya aeno ge hu'niya vekamo'a alagepa kava'mo hu'niya kava'ae'mo ava gemo aeta hakalo hutapa hapa paisageno ala agi'amo alisiyafe'mo lekana paino lapate'niye. <sup>10</sup> Hogotetapa afa vaya'mo mai'naya'monanafa hemenimo Goti vaya'amo mai'nae. Hogoteno Goti'a hau huno olapate'niya'monanafa hemenimo hau huno lapate'niye.

*Goti ali'ya'amo ne'aliya vaya'amo maiyo, huno hu'niya gemae*

<sup>11</sup> Nahau'niya vaya'nimogitapae, amega lapakufamo'mo hau'niya kava'mo'a lapakupi mafa'nee'mo kame huno ne'ate. Kalaga vaya'mo maige nata netapa eta maige hutapa mai'naya'mofe'mo lapao ke hovanagi, ani kavafe'mo ha'ao, nehutapa osiyo. <sup>12</sup> Lapakaemo ma mopafi vaya'aitegamo alagepa kavake'mo hutapa maiyo. Apakaemo lapakaefe'mo, hosu kava'mo nehae, hu'a hu'a faipa hu'a nelapatesaya vaya'mogimo alagepa kavatapimo ne'agesageno'ae'mo Goti'a apakaete'mo eno yagaino apatesiya afina'mo agi'ale'mo ali'a asaga hu'a ategae.

**13-14** Lapakaemo Ala kava nefe'mo lapakesamo ne'afitapae'mo muki ma mopafi vaya'aife'mo yagai'a ne'apataya vaya'ai ge'apimo afiyo. Yagaino ne'apateya hogote kini vekamo ge'amo afige ali'ya'ale'mo lekana paino apate'niya vaya'ai ge'apimo afige hutapa maiyo. Kini vekamo'a apakaemo hosu vaya'aina kayo'mo apamige alagepa vaya'ai apaki'apile'mo ali'a asaga hu'a apatege hisayafe'mo alino apate'nige'a u'a ali'ya'amo ne'aliye. **15** Lapakaemo alagepa kavatapileti'mo o'afi'nisaya vaya'ai apavayale'mo kitapa halututapa apatesage'a negi nagi gemo osisayafe'mo Goti'a hau'niye. **16** Lapakaemo ke'aepa gemo afe'alumelaga o'maitapa afa vaya'mo ai'naya'mofe'mo hosu kava'mo afa'a hisaya vaya'mo o'maitapa Goti ali'ya'amo ne'aliya vaya'age'mo maiyo. **17** Muki vaya'ai apaki'apile'mo alitapa asaga hiyo. Konagatapie'mo lapaino. Gotife'mo koli hiyo. Ala kini vekamo hogote vekatapimo ala agi'amo amiyo.

*Hanageke ya'mo alisayafe'mo Kalaisi  
aiyakamo aliyo, huno hu'niya gemae*

**18** Ali'ya'mo ne'aliya vaya'mogitapae, hu'na, ali'ya aepa vekae'mo koli nehutapa aiyafi'mo maiyo. Alagepa kava'mo hute'a yuna apaipamo kali'ne'a yagai'a nelapataya vaya'ai apaiyafike'mo o'maitapa hosu kava'mo hu'a yagai'a nelapataya vaya'ai apaiyafi'e'mo afa'a maiyo. **19** Mago vekamo'a hosu kava'mo osu'nisigeno hanageke ya'mo

alino amisigeno'ae'mo Gotifeke'mo agesamo ne'afino'ae'mo, Gotitefe'mo afa'a aliguve, huno nehisiyana Goti'a amuse huno ategaiye. <sup>20</sup> Inagi lapakaemo hosu kava'mo nehisage'apae'mo lapamagisagetapae'mo, kanalene, hutapa nehisayana ala lapakitapimo aligafiye. Ha'ao o'aligaya'monanafa alagepa kava'mo nehisage'apae'mo lapakaetegamo hosu kava'mo hisayana kanalene, hutapa nehisageno'ae'mo Goti'a amuse huno lapategaiye. <sup>21</sup> Goti'a ani kava'mo hisayafe'mo lapakaefe'mo ago keya aeno ge hu'niye. Kalaisi'a mani agufa kava'mo hu'niya'mofe'mae. Kalaisi'a lagaetefe'mo hanageke ya'mo ali'niyanageta akame hisuna agufa kava'mo ago hu male'niya'mofe'mo aiyakamo alisuna kava'mo hane'niye.

<sup>22</sup> Agaemo magoke hosu kava'mo osu'nige'a o'agege avayafati'mo magoke aigofe gemo osu'nige'a o'afige hu'nae.

<sup>23</sup> Hu'a faipa hu'a ate'nageno'ae'mo ge'apile'mo aeno atagaina huno huno faipa huno o'apate'niye. Kana ya'mo amige amagige hu'nageno lusi kava huno agafu ki'nigeno'ae'mo, lapamagiguve, huno osu'niya'monanafa alagepa huno alino fako huno ne'apateya vekamo ayapi'mo alino male'niye. <sup>24</sup> Agai'age'mo hosu kavatimo agufafi'mo aliteno malipu yosale'mo fali'niye. Hosu kavatilefe'mo falitetae'mo alagepa kava'alefe'mo afa'a maisunafe'mo fali'niye. Amagi'nageno fugina'amo'mo hu'niya kava'aleti'mo Goti'a alino alagepa huno lapate'niye. <sup>25</sup> Hogotetapa ataleta utetapa

hu'naya sipisipigana hutapa mai'naya'monanafa  
 hemenimo sipisipile'mo yagaino ne'apateya  
 veckamo'a lapakupi mafa'nele'mo yagaino  
 nelapateya vekatapilegamo aita ataginetapa  
 e'nae.

### 3

*Muki ve yalavemogitapamo mani kava'mo  
 hiyo, huno hu'niya gemae*

1-2 A'ne'apimogitapae, lapakaemo ina kava'mo hutapa anautapimogi apaiyafi'mo mai'netapa ge'apimo afiyo. Lapakaemo ge osisage'a Goti ge'amo no'afiya anautapimogimo lapakete'apae'mo, apaune'apame'mo'a hosu kavafe'mo ohapau'nige'a Gotifeke'mo koli nehae, hu'a hisagetapae'mo alagepa kavatapileti'mo Gotitegamo apavalelitapa egae. 3 Alagepa konali yatapimo amega lapakufale'moohaneno. Konali yatapimo lapayokate'mo alo nehaya kavatapimo ohanege lapakufale'mo ne'aliya konali yatapimo ohanege kukanamo alita ne'veiya kava'mo ohanege huno ohanenageta lapaipafike'mo fala kino haneno. 4 Lapakaetegamo hosu kava'mo afole ne'aisigetapae'mo yuna lapaipa falu lapaipamo kaligeno'ao, konali yakana huno hanege hanege huno haneno. Goti'a ani kavafe'mo, alagi hogote kanale kava'mo hane'niye, huno amuse nehiye. 5 Akeya'vilaga apaote a'nemogimo Gotife'mo, laha maegaiye, hu'a hu'naya a'nemogi anau'apimogi apaiyafi'mo mai'ne'apae'mo ani agufa konali ya'apimo ali'a

vai'nae. <sup>6</sup> Sela'a ani kava huno Emalehamu aiyafi'mo mai'neno ge'amo afiteno'ae'mo, kava ne'nimae, huno hu'niye. Lapakaemo atete osutapa alagepa kava'mo hutapa mai'nisayana Sela a'mafa'ne'amo mai'nae.

<sup>7</sup> Anau'apimogitapae, hu'na, a'netapie'mo, apakufamo lokiya o'vei'niye, hutapa lapakesamo ne'afitapa apakae'e'mo alagepa hutapa magokepi lokaeta maiyo. Goti'a maige maige hutapa maisaya ya'mo fiku lapa maeno lapamisiya kava huno a'netapi'e'mo apamigiya'mofe'mo apaki'apile'mo alita asaga hutapa apateyo. Fiku yanageno nunumu hisaya getapimo'mo alagepa huno afole o'aigiyanganagi mani kava'mo hiyo.

<sup>8</sup> Nagaemo atupa ge'nimo lapa pai'nae'mo, magoke lapaipa lapakesamo alitetapa magoke agufa lapaipamo kalitapa maiyo. Konagatapie'mo afalu afalugana agufa kava'mo hutapa lapau lapayamopafi'mo lapaino. Lapau hutapa apateyo. Vaya'aitegamo himu'namu kava'mo osutapa vase vase kava'mo hiyo. <sup>9</sup> Inagi mago vaya'mogimo lapakaetegamo hosu kava'mo nehisagetapae'mo anona'apilefe'mo hosu kava'mo osiyo. Mago vaya'mogimo hu'a faipa hu'a lapatesagetapae'mo anona'apilefe'mo huta faipa huta o'apatetapa Goti'a lapa maeno, hutapa hapa paivo. Goti'a ani kava'mo nehisageno'ae'mo lapa maesiyafeke'mo keya aeno ge hu'niye. <sup>10</sup> Ani kavatefe'mo Goti mukufi gemo'mo huno'ae'mo, Alagepa huta mai'neta lamogaga aisunafe'mo lahau'niye, hu'a nehisaya vaya'mogimo ani agufa kava'mo hu'a maisayafe'mo

hosu gemo osuge aigofe gemo osuge hu'a alagepa hu'a yagaiyo. <sup>11</sup> Hosu kava'amo mai'a halove hu'a atalete'a alagepa kavake'mo hiyo. Alagepa hu'a magokepi lokae'a maisaya kavafe'mo kahauya hu'a age'a vegala ae'a atafaiyo. <sup>12</sup> Na kava nehiya'mofe'mae. Ala kava ne'mo'a alagepa kava'mo nehaya vaya'mo aulu hapaeno apake'neno'ae'mo agesamo aino halo ai'nigeno nunumu nehaya ge'apimo ne'afiye. Ge'apimo ne'afiya'monanafa hosu kava'mo nehaya vaya'aife'mo hosu augosamo kalino ne'apate.

<sup>13</sup> Lapakaemo alagepa kava'mo hisayafe'mo lapayamukiki nehisage'apae'mo ina lagimo lapakaetegamo hosu kava'mo hugae. <sup>14</sup> Osugaya'monanafa alagepa kava'mo nehisageno'ae'mo mago vekamo'a lapakaetegamo hosu kava'mo nehisiyana Goti aulagale'mo alagepa huta mai'nayanagetapa afa'a lapamogaga aigae. Mago geleti'mo hu'a *lapausoli hisaya gemo nehisagetapae'mo lapamo'ya o'aitapa koli osiyo.* <sup>15</sup> Lapamo'ya o'aitapa Gotifeke'mo lapaipafi'mo koli nehutapae'mo, Ala kava netie, hutapa lapaipafi'mo hiyo. Vaya'mogimo lapakaef'e'mo, na kava hidgetapae'mo Gotife'e'mo agava mai'netapa lapavayagunagu nehae, hu'a lapafi gesagetapae'mo ge'apile'mo aeta atagaina hutapa hapa paisayafe'mo muki afina'mo alo hutapa maiyo. Himu'namu gemo osutapa Gotifeke'mo koli nehutapa

alagepa gemo hutapa hapa paiyo. <sup>16</sup> Yu'ilaga mafa'nemo'mo hosu kava'mo nehae, huno osisiyafe'mo alagepa kava'mo hiyo. Alagepa kava'mo nehisage'apae'mo Kalaisi'mo akame nehaya alagepa kavatapie'mo hu'a faipa hu'a nelapatesaya vaya'mogimo lapakete'apae'mo apavagage hugiye. <sup>17</sup> Goti'a hau'ninageno'ae'mo, kana ya'mo aligae, huno nehisigeno'ae'mo alagepa kava'mo hu'naya'mofe'mo kana ya'mo alisayana kanale hugiya'monanafa hosu kavatapilefe'mo alisayana hosugiye. <sup>18</sup> Ani kavatefe'mo Kalaisi'a fatago vekamo mai'neno hosu vaya'ai hosu kava'apimo aimu'yale'mo emineno muki afinafe'mo magoke afina'mo ago falino apate'niye. Agaemo Gotitegamo lavalelino haisiyafe'mo agufa'amo fali'niya'monanafa Goti Auneme'amo'mo ago alino he tino ate'niye. <sup>19</sup> Agaemo Goti Auneme'aleti'mo Noa'e'mo magokepi lokae'a mai'naya vaya'aife'mo Goti ge'amo aeno hakalo huno hapa pai'niya'monanafa o'afi'a falite'apae'mo hemenimo apaune'apame'amo Goti kalavusifi'mo ne'maiye. <sup>20</sup> Noa'a hogoteno alopa sipimo alo nehigeno'ae'mo Goti'a vase vase huno apakava maime maime e'niya'monanafa ge'amo o'afi'nae. Goti'a hapa o'maeno eiti'a vaya'atoge'mo anite'mo hane'niya sipifi'mo mai'naya vaya'ai apakufamo alino katino apate'niye. <sup>21</sup> Apakaemo sipifi'mo mai'nageno'ae'mo Goti'a anipati'mo apakufamo alino katino apate'niya kava'mo aune kava'mo huno Goti'a ani'mo fale'a nelataya

kavateti'mo lagufamo alino katino nelite. Fiku ani'mo fale'a ne'apataya kava'mo'a amega apakufale o'ani'ya'age'mo aeno kalo paeno ne'ataleya'monanafa Goti'a Yesu Kalaisi'mo alino he tino ate'niya kavateti'mo yu'ilaga mafa'netimo alino alagepa huno late'niya mafa'netifati'mo Goti ge'ale'mo aeta atagaina huta nehune. <sup>22</sup> Kalaisi'a he tino koku'napi'mo haino Goti lamaga haopale'mo mai'neno muki vaya'aite'mo yagaino ne'apate. Goti'a enisole vayanagi yagai'a ne'apataya vayanagi lokiya apaune'apame'e vayanagi huno alino Kalaisi aiyafi'mo pate'nigeno yagaino ne'apate.

## 4

<sup>1</sup> Kalaisi'a lagaetefe'mo kanamo aliteno agufafi'mo lusi kava huno agafu ki'niye. Lapakaemo ani agufa kava hutapa kanamo alisayafe'mo lapakesamo afiyo. Apakufafi'mo kanamo ali'naya vaya'mogi hosu kava'apimo atale'naya kavafe'mo lapakesamo afi'netapa ani geleti'mo alita lokiya vaitapa lapateyo. <sup>2</sup> Apakaemo hosu kava'apimo ago atale'naya'mofe'mo ma mopafi'mo maime maime ne'e'apae'mo hapa'ye hu kava'mo atale'a Goti'a hau'niya kavake'mo akame hisaya kava'mo hane'niye. <sup>3</sup> Lagaemo hogoteta malaga vaya'mogi hapau'niya kavake'mo alagi huta mai'nona'monanafa hemenimo mago'e huta osugune. Hogoteta kumai kava'mo hisunafe'mo apayate alige amega lagufamo'mo hau'niya kava'mo huge ani'mo neteta negi nagi kava'mo huge ogefagemo huge ani'mo

neteta hosu kigi yokalo gemo huge nehutae'mo aigofe gotitefe'mo hosu mono huta mai'none.

<sup>4</sup> Hemenimo lapakaemo Satani vaya'e'mo ani agufa hosu kava'mo afela vaya'ai kava'mo nosaya'mofe'mo Satani vaya'mogi hapau aite'a hu'a faipa hu'a nelapatae. <sup>5</sup> Apakaemo Goti'a alo huno mai'niyanageno alino fako huno apatesiya vekamo aulagale'mo fali'naya vaya'e afa'a ne'maiya vaya'e'mo he tisageno hosu kava'apie'mo apafi gesige'apae'mo ani kava hu'nove, ma kava hu'nove, hu'a ae'a hakalo hu'a ha paigae. <sup>6</sup> Ani kavatefe'mo fali'naya vaya'aife'mo alagepa faigoko ge'amo ago ae'a hakalo hu'a hapa pai'nae. Apakaemo ma mopafi'mo mai'nage'apae'mo, hosu kava'mo hu'nae, hu'a ali'a fako hu'a apate'naya'monananafa apaune'apamepati'mo Goti ge'amo akame hisayafeke'mo alagepa faigoko ge'amo afi'nae.

### *Goti ali'ya'amo aliyo, huno hu'niya gemae*

<sup>7</sup> Muki ya'amo alagi hano hisiya afina'mo ago hogo nehiya'mofe'mo nunumu nehutapae'mo lapakufale'mo alagepa hutapa yagaita ate'netapa lapaipamo alo hiyo. <sup>8</sup> Hogote kava'mo hutapa konagatapie'mo lusi kava huno lapau lapayamopafi'mo lapaino. Konagatapie'mo lapau lapayamopafi'mo nelapaiya kava'mo'a hosu kava'apimo aeno ati kaeno atalegaiye.

<sup>9</sup> Nata vaya'mo notapile'mo ne'esagetapae'mo ge ohapauge lapaipa kafa ohapaege hutetapa alagepa hutapa ne'yake'mo apamiteta yagaitapa apateyo. <sup>10</sup> Kava ne'apimogi aepa vekatapimo

yate'mo ne'yagaiya kava hutapa asole ya'mo fiku lapa maeno lapami'niya ya'mo alita fako hutapa apamige'apa anonale'mo lapamiyo.

**11** Goti ge'amo ae'a hakalo hu'a hapa nepaiya vaya'mogi Goti avayamo ali'naya'mofe'mo lokiya vai'a ae'a hakalo hu'a hapa paigae. Hapa ne'maeya vaya'mogi Goti'a alino ne'apamiya lokiya'aleti'mo hapa maege'apao vaya'mogimo Yesu Kalaisiteti'mo Goti agi'ale'mo ali'a asaga hu'a ategae. Goti'a ala agi'amo hanege yagaino ne'apateya lokiya'amo hanege huno muki afina'mo alagi hanege hanege huno haneno. He, lama ge.

*Kalaisi agi'alefe'mo kanamo alisaya kavafe'mo ava gemo hu'niya gemae*

**12** Nahau'niya vaya'nimogitapae, hu'na, Hosu kava'mo atagana huno lapamalageka nehisigetapae'mo, aeto agufa kava'mo lagaetegamo afole ne'aiye, huta osutapa lapau o'aiyo. **13** Kanamo ali'niya kava huno kanamo ne'alitapa agae'e'mo magoke agufa kanamo ali'naya'mofe'mo lapamogaga aiyo. Kalaisi ha le konali ya'amo afole aisiya afina'mo lusi kava hutapa lapamogaga aigaya'mofe'mo mago'e hutapa lapamogaga aiyo. **14** Lapakaemo Kalaisi'mo akame nehaya'mofe'mo ge nelapausayana Goti aulagale'mo alagepa hutapa mai'naya'mofe'mo afa'a lapamogaga aigae. Goti Auneme'amo ha le konali Auneme'amo'mo lapakaete'mo alagi mai'niya'mofe'mae. Apakaemo Gotife'mo hu'a faipa hu'a ne'atagetapae'mo lapakaemo

ala agi'amo ne'amiye. <sup>15</sup> Fiku yanagetapa vaya'mo nehapaya vaya'e'mofi kumaya'mo ne'aliya vaya'e'mofi gamani vaya'ai ge'apimo amagi'a ne'atalaya vaya'e'mofi ali'ya'apimo ohane'nige'a himu'namu gemo nehaya vaya'e'mofi hutapa mai'naya'mofe'mo kanamo aligae. <sup>16</sup> Aligaya'monanafa Kalisitini vaya'mo mai'naya'mofe'mo kanamo alisayana lapavagage osutapa ani kavatefe'mo Goti agi'ale'mo alita asaga hiyo. <sup>17</sup> Goti'a agoti huno apateteno kayo'mo apamisiya afina'mo ago afole ai'niya'mofe'mo afamo anaga'ale'mo aepa faigiye. Goti'a lagaetegamo ago aepa faino agoti huno nelatesiyana alagepa faigoko ge'amo no'afiya vaya'aina agoti huno apatesiya afina'mo haiya kava hu'a maigae. Vaehae, hu'na, <sup>18</sup> Ani kavatefe'mo Goti mukufi gemo'mo huno'ae'mo, Goti'a fatago vaya'ai apakufamo alino katino apatesige'a alagi alagepa hu'a maisayafe'mo hai'a hogo'a metale'nayana mono nosaya vaya'e hosu kava'mo nehaya vaya'e'mo vaehae, hu'na, haiya kava hu'a maigae. <sup>19</sup> Inagi Goti'a hau'ninageno, kanamo aligae, huno nehisaya vaya'mo alagepa kava'mo hute'a Goti'a lapakupi mafa'nele'mo yagaino apatesiyafe'mo alita ayapi'mo maleyo. Agaemo muki ya'amo alo hu male'niya vekamo huguve, huno hu male'niya ge'amo alagi akame nehiya vekamo mai'niya'mofe'mo lapakupi mafa'nemo alita ayapi'mo maleyo.

*Goti mafa'ne'aite'mo yagai'a ne'apateya vayatama vaya'aife'mo hu'niya gemaе*

<sup>1</sup> Nagaemo lapakae'e'mo magokepi lokae'a mai'ne'a yagai'a nelapataya vayatama vaya'aife'mo gemo hapa paigesuve. Nagae'e'mo yagai'na ne'apatova vayatama vekamo mai'nove. Naulagafati'mo Kalaisi'a age'nogeno kanamo ali'nige'na agete'nae'mo ae'na hakalo hu'na hapa nepauva vekamo mai'novanage'na Kalaisi'a ha le konali ya'amo afole aisige'nae'mo hetama'nimo aliguge. Lapao ke hovanagi, <sup>2</sup> Goti'a sipisipi anaga vaya'amo apavalenno lapayapi'mo lapami'niya aya'ale'mo alagepa huta yagaitapa apateyo. Lapakaemo ani ali'ya'mo alisayafe'mo olapau'nisigetapa alisayana kanale osugiye. Lapau'nisigetapa eke'mo ani ali'ya'mo aliyo. Hosu monimo alisayafe'mo ani ali'ya'mo o'alitapa lapaipamo'mo hatu nehinagetapa ali'ya'mo aliyo. <sup>3</sup> Goti'a apavalenno lapayapi'mo lapami'niya sipisipile'mo yagaitapa ne'apatetapae'mo alita afepi o'apatetapa lapakame hisayafe'mo apakaetegamo alagepa kava'age'mo hiyo. <sup>4</sup> Hogote vekamo sipisipile'mo yagaino ne'apateya kava vekamo emineno afole aisigetapae'mo ha le konali yatapimo alagi hano osisiya hetamatapimo aligae.

*Apaiyafi'mo maiyo, huno hu'niya gemaе*

<sup>5</sup> Neya vaya'mogitapae, hu'na, vayatama vaya'ai apaiyafi'mo mai'netapa ge'apimo afiyo. He, muki vaya'amogitapamo, ina agufa vaya'mo mai'none, nehutapa ali'ya'mo ne'aliya vaya'mogimo ali'a ne'veiya kukenamo

ali'a ne'vaiya kava hutapa konagatapimogi apaiyafi'mo mai'netapa ge'apimo afiyo. Na kava nehiya'mofe'mae.

Goti'a ala vaya'mo mai'none, hu'a apakesamo ne'afiya vaya'aife'mo kame huno ne'apateya'monanafa ina agufa vaya'mo mai'none, hu'a apakesamo ne'afiya vaya'aina fiku hapa maeno ne'apamiye.

<sup>6</sup> Ani kava'mo nehiya'mofe'mo lapakufamo alino afepi lapatesigetapae'mo Goti'a ayamufa vekamo aiya afe'alumelaga mai'nigeno'ao hau'nisiya afina'mo alino asaga huno lapateno.

<sup>7</sup> Agaemo lapakaefe'mo hau'nigeno alagepa huno yagaino nelapateya'mofe'mo lapakesa ala'amo ne'afitapa lapausoli hisaya kavatapimo alita Goti'mo amiyo. <sup>8</sup> Kametapimo Satani'a kaekae nehiya laiyonigana huno mai'neno'ae'mo vaya'mo hapaesiyafe'mo umenitata nehiyanagi lapau mai'mai osutapa alagepa huta kava yagaitapa maiyo. <sup>9</sup> Gotifeke'mo mago'e hutapa lapakesa afita fatago nehetapae'mo kame hutapa ateyo. Ago afi'nayana lapakaemo kanamo ne'aliya kava hu'a muki ma mopafi ne'maiya konagatapimogimo kanamo ne'aliyanagi he titi lokiya vaitapa maiyo. <sup>10</sup> Fiku lapa maeno nelapamiya Goti'a Yesu Kalaisiteti'mo ha le konali ya'amo alagi hanege hanege huno hanesiya ha le konali ya'amo alisunafe'mo lagaefe'mo keya aeno ge hu'niye. Inagi aise afina'mo kanamo alisageno'ae'mo agaemo alagi alino alagepa huno lapatege alino lokiya vaino lapatege lokiya'amo alino lapamige

hisigetapae'mo he tita lokiya vaitapa maigae.  
11 Ala agi'amo hanege yagaino ne'apateya  
lokiya'amo hanege huno muki afina'mo alagi  
hanege hanege huno haneno maino. He, lama  
ge.

12 Nagesamo afuvana Silivenisi'a kanale  
konagatimo'mo naha mae'nige'na mani aise  
avo'mo nekaove. Ali'na lokiya vai'na lapatesuva  
agufa gemo hu'na lapa pai'nae'mo, ago  
afi'novana Goti'a fiku hapa maeno ne'apamiya  
kavafe'mo ava gemo hu'nae'mo, lama gemo  
hane'niye, hu'na mani avo'mo kae'na lapa  
nepauve. Ani kavatefeke'mo lapakesa afita  
fatago huta atafauta alagi hutapa maiyo.  
13 Goti'a ago lekana paino lapate'niya kava  
huno Mamiloni kotega siosi vaya'mo lekana  
pairo apate'niye. Apakaemo ge lapamamae'nae.  
Mafa'ne'nimo Maki'e'mo ge lapamamae'niye.  
14 Konagatapie'mo lapau lapayamopafi'mo  
lapau'ninagetapa ge ne'apamamaetapa  
hapaeta neyo. Kalaisi Yesupi'mo mai'naya  
vaya'mogitapae, lapaipamo'mo falu hino.

**Saufa Kotalake Gema  
The New Testament and Portions of the Old  
Testament in the Keyagana Language of Papua New  
Guinea  
Sampela hap Buk Baibel long tokples Keyagana long  
Niugini**

copyright © 2001 Wycliffe Bible Translators, Inc.

Language: Keyagana

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 11 Nov 2022 from source files  
dated 9 Oct 2020

dec78c50-71b7-5d19-97bf-bf625abcf44